

interview met.....

[Jubileum: 50 jaor rapido](#) >> [Jubileumjaar](#)



**SPANJE-----COSTA DEL SOL 🤘-----
OKT. 2010**

Lekker zunke, lekker windje, lekker waerke en dan un leuk venloos verhälke schriève.

We zitte deze kiër in Spanje in Benalmádena met 2 vrouwluuj die in de jaore '70 beej Rapido vertrokke zien.

In dees umgaeving is ut gen straf um eur verhaol op pepeer te zette.

Unne verslaaggaever haet tenslotte auk vakantie nuedig.

Stel ôch efkes veur.....

TOOS:

As Toos Peters in Venlo opgegroujd same met mien zuskens en broor as dochter van unne gerdeneer, wao d'r toen nog zat van ware.

Vanaaf 1972 woën ik in Venray met Cees en weej hebbe 2 zeuns Robert en Paul.

Cees haet as zelfstandige ôndernemer inmiddels hölp gekrege van Paul.

Wilt ge 'n zônnescherm dan kin Robert ôch helpe as kleine zelfstandige.



MIENTJE:

Ik bin in Venray gebaore as Mientje van Asten en bin vanaaf mien 4e jaor in Bliërick groët gewaore.

Asse aan unne Braobander bliëfs hange dae in Den Bosch werk, kumpse vanzelf in Braobant te woëne.

Vanaaf 1973 woën ik in die moëje provincie same met Frans, ôs kinder Paula en Rob gaon inmiddels euren eige waeg,

Ik heb 20 jaor gewerk as neuroloogsecretaresse beej 't epilepsiecentrum Kempenhaeghe in Heeze en geneet sinds 3 jaor van de VUT

Waas 't nog leuk naó Rapido.

TOOS:

Door Rieky de Bock bin ik lid gewaore van Rapido en bin nog waat jörkes vanoët Venray kómme traine.

Toen in Venray de sporthal klaor waar bin ik toch maar dichter beej hoès gaon badmintonne. Ze ginge beej badmintonclub Venray neet zoë amikaal met elkaar um dan beej Rapido.

Dao goof ut auk gen droppings waosse met 2 man tegeliék in unne juute zak beej ut Zwarte Water van den berg aaf meus renne.

Of waosse beej un auto-rally taeg un kruutsbeeld meus praote.

Maar we hadde in Venray un gezellig en good kômpetitieteam, ut ging beej dees club veural um de sport *zônder toetje!*.

MIENTJE:

Vuël vrindinne van mich ware lid van Rapido dus woort ik auk lid.

We zien met 'n aantal minse beej Scorpius begônne met badmintonne en langzaam euvergestap naor un échte club, Rapido dus.

Ik bin neet zoëlang lid gewaes maar heb in Braobant nog jaore as recreant gebadmintond.

Ik misde waal 't doorzakke nao de training beej Tivoli.

De politie kwaam, as ut erg laat woord, waal ens langs um te zegge det ut sloétingstièd waar.

Vriedaagsmorgens had ik dökker spiët van dae korte nach, as ik op ut werk in de laup van de morge un flinke inzinking kreeg.

Maar good, de bis jôngk en de kins waal waat hebbe, ut woort toch weer wiekend.

Mien vader zoel zegge; 's-áoves un groëte meid, s'-morges un groëte meid.



Waat is de leukste of vervaelendste herinnering die se haes oèt diene Rapidotièd.

TOOS:

In 1971 meuste we met ôs kômpetitieteam unne inhaalwedstrièd speule in Zuid-Limburg.

We vertrokke met z'n veere naor ut zuuje, Jo Giesberts zoot achter ut stuur en Noud Alsters zoot d'r naeve.

Elly (de verslaaggaeveer). en ik zoote achterin.

Beej Quatre Bras in Tegelen stônd unne vrachwage dae links aaf woel slaon.

Jo kwaam röstig aanrieje toen we van achter aangereje woorte door un buske met bejaarde nônnne d'r in.

Unne flinke klap en efkes later nog unne klap van de volgende wage.

Jo goejde ut stuur gelökkig um en daorum kwame we in de berm terech taeye unne baum en neet ônder de vrachwage.

Veurluipig gen badmintonne mièr veur mich want ik had d'r un hersenschödding aan euvergehalde en meus 6 waeke röste.

Maar weej kóste ut naovertelle dankzij Jo zien snelle reactie en det waar ut belangrièkste.

Leuke herinneringe heb ik veural aan de vastelaovesbals en de jaarvergaderinge beej Tivoli.

Nou ja, vergaderinge is messchien te vuël gezag, die ware snel achter de rök.

Ut grutste gedeilte van den aovend bestônd oèt un spellecircuit veur volwassene wao erg vuël beej gelache woort.

Maar good det we toen nog allemaol jôngk van liéf ware, want anders had ut ziekehoés geregeld klante gehad.

Laup maar ens as un zootje ôngeregeld op groëte skieës naor de andere kant van de zaal zônder óngelökke.



MIENTJE:

De vastelaovesbals ware altièd erg geslaag en in de zomerperiode de midzomeraovende in Grubbevorst beej de Wielder.

Lekker in de bös beej ut kampveur tot 's-morges vruëg, same zinge en lol make, nemus had d'r las van.

Ik kin mich herinnere det we um half 6 met vuël leweit met de aend van Rieky de Bock naor hoés zien getuf.

Waar ut toen neet **l a n g e r** zomer of mein ik det maar ?

Later haet Pierre Smeets mich dökker gevraog mei te doon aan de knômmeltoernooie, det waar veur mich net un reünie.

Minder leuk waar ut geintje van Hans Mans, dae mich un glaas beer achter in mien nieje spijkerbôks haet geschöd.

Wat waar ik toen kwaod op um, daorum heb ik det netuurlik ônthalde.

Welke sport duisse noow en waat zien dien hobby's.

TOOS:

Ik gaon elke waek unne aovend naor de Yoga en Cees en ik gaon geregeld wandele of fietse met vrinde of allein.

Sinds 'n paar jaor gaon ik in Januari met mien zuske mei op wintersport.

Ôs Thea woënt in Doetinchem en is lid van un wandelclub waobeej ik in Januari mei meug as introducée..

'N gedeilte van de club duit skieë en de res (wao weej beej huere) make sniejwandeling, erg gezellig met zón stel.

Eine kiër in de waek staon ik as vrijwilliger achter de bar in de Kempphaan in Venray.

Det is un ôntmoetingscentrum wao door allerhande groepe diverse activiteite gedaon waere.

Prinses Maxima is ut vurrig jaor beej Home-start op bezoek gewaes vanwaege ut 15 jähöng bestaon.

De prinses is un spontane meid det ut feesleed gewöön mei stönd te zinge as of ut mei geoeffend had.

Ut is plezeerig um un paar eurkes in de waek achter de bar te staon en met minse bezig te zien..

MIENTJE:

Mien waek zit good vol met activiteite.

Elke maondaag wandele we 'n paar eurkes met 'n aantal dames.

Dinsdaags doon ik 'n eurke Tai Chi en um de konditie op piel te halde 1 oor in de waek kônditietraening.

In de zomer is ut lekker um boéte te tennisse, dus bewaeging zat.



As hobby doon ik ut secretariaatswerk veur de Sylvesterlauf in Heeze.

De wedstriëd wuerd in principe op de zôndaag tösse Kers en Niejjaor gelaupe.

As det ôngunstig velt, wie dit jaor, dan neme we de zôndaag véur Kersmis.

Dit jaor wuerd ut al veur de 26e kiër georganiseerd en de sporter kin 5, 9 of 15 km door bös en hei renne rôndum Heeze.

D'r doon toch rônd de 400 laupers mei en trek altiëd vuël volk.

Ik vind ut leuk um thoës aaf ten toe te kaoke veur un groepke vrinde of familie.

Maar ik gaon auk gaer oët aete um van andermans creaties te geneete.

Same met Frans of met vrinde op vakantie gaon, kinse waal 'n hobby neume.

As vutter kinse door 't jaor auk ens spontaan 'n wiekendje of midwaek boeke en det doon weej geregeld.

Geisse gaer op vakantie en welke plek haet dien veurkeur.

TOOS:

Weej gaon gaer op vakantie maar hebbe eigelik gen veurkeur.

Frankrieëk is 'n fijn land um op vakantie te gaon.

Ut bevelt ôs veural erg good op ut platte land tösse de "eige" minse in un dôrpke wie St. Andre de Najac.

Aan de Spaanse kus is ut lekker um te ônspanne in de werme zon, wie we noow auk zitte met oétzich op de zieë.

Öesterieëk trek ôs vanwaege de berg, de kins dao lekker wandele en geneete van de vaergezichte en de neteur.

De spannendste bezigheid tot noow toe waas unnen daag Raftte vanoét Side in Turkije op de Köprülû-rivier.

De Köprülû-rivier leet in un national park in ut Taurusgebergte, de raftingroute waar 14 km langk. Ônder leiding van unne Türkse knôl van messchien 20 jaor, wao 11 senioren naor meuste luustere um alik op ut indpunt aan te kômme.

Hae kôs gelökkig ingels en kôs good schriëwe, in ut watergeweld waar det waal nuedig.

We hadde allemaol un zwumves en waterschoon aan en zoote met de veut ônder un lus in den boët.

Det zwumves haet zien nut beweeze want eine van ôs gezelschap is oét den boët gekiep en door dae knôl supersnel weer oét ut water gevis.

Zôn avontuur is ônvergaetelik.



MIENTJE:

Ik dink det weej ônder de Frankofiele valle.

We zien al dôk in Frankrieëk op vakantie gewaes en ik spraek de taal auk redelik.

We hebbe weer 'n tent gekoch um lekker alderwets te gaon kampere in Frankrieëk.

Uiteraard op un kleine Franse camping wao we gén Nederlands hoove te praote.

Ik heb auk waal ens in de Vogezen unne workshop Eutonie gedaon.

Ut is unne ôntspanningscursus met allerhande activiteite euverdaag, det is prima bevallen.

Aafgelaupe jaor hebbe we veur ut iërs in Egypte gesnorkeld, geweldig waasse dao ônder water allemaol taege kums.

Dao wil ik beslis nog ens truuk.

De jaarlikse vakantiewaek met de vrindinne en aanhang wie noow aan de Costa Del Sol zoel ik auk neet gaer wille misse.

As land haet Frankrieëk de veurkeur maar in Nederland zien auk vuël plekke die de meujte waerd zien.

Wao hebse unne groëte haekel aan.

TOOS:



Ik heb unne haekel aan yoghurt, karnemelk en geitekiés. Allein al die lôch dao kinse mich mei ut bos injage..

Dao zal nemus van wakker ligge maar det schuut mich ut ièrste te binne op dees vraog. Vaerder bin ik genne lastige aeter huer, d'r bliëve nog zat lekkere dinger euver .

MIENTJE:

Ik knap aaf op minse die zitte te zanikke.

Door te zanikke losse niks op en idderein kin toch waal op de ein of andere meneer un positieve beejdrage levere.

D'r zien zoëvuël leuke dinger in ut laeve, maar sóms mósse d'r waal naor op zeuk.

Hebs dich un laevesmotto.

TOOS:

Bliéf met 2 bein op de grônd staon en doot normaal.

Trouwes op ein bein velse ièrder um heb ik op Yoga gemerk.

MIENTJE:

Plök den daag, geneet en maak d'r waat leuks van.

Ut kin zoë aafgelaupe zien.

Waat goof dich de grutste kick of haet de grutste impact gehad in dien laeve.

TOOS:

De gebaorte van ózze kleinzoon Willem haet unne groëte impact gehad en waat leuks toegevoog aan ós laeve.

Willem is elke waek unnen daag beej ós en de geschiedenis herhaolt zich.

De zuus dinger van dien eige kinder truuk, maar de neems d'r noow mièr den tièd en rös veur.

Ut is leuk um met zôn menke unne band op te bouwe.,
Ik weit neet of hae det met de 15,16 auk nog zoë zuut, we zeen ut waal.

De grutste kick kreeg ik van ut rafte in Turkije, maar det heb ik al verteld.



MIENTJE:

Ut snorkele in de roëje zië in Egypte det waar effe kicke.

Ik heb dökker gesnorkeld in Spanje maar dit waar toch efkes waat anders.

De zwums tösse de moejste visse met de gekste vorme en prachtige kleure.

De hebs de neiging um ze aan te rake maar.... de mós van de neteur aafbliëve, auk ônder water.

Kicke waar auk ut rafte in Turkije, wie al gezag is, det kinse in ôs vlaake lendje neet en waas daorum unne ônvergaetelikke daag.

Met wae zoelse unne kiér un beschuutje wille aete en waarom.

TOOS:

Ik heb enorme bewôndering veur André Rieu waat dae in 25 jaor haet gepresteerd en

opgebouwd.

Ut liek mich gezellig um in zien kastiëlke in Maastreech met um un beschuûtje te aete met un lekker glaeske wien.

Marjorie kin messchien un passend menuuke regele en intösse guf ut Rieu-orkes in dae groëte aetzaal un moej concert.

D'r meuge netuurlik auk miër beschuûtleeffhebbers kômme geneete, det mak ut nog gezelliger.

André kin mich auk meineme naor ein van zien optraejes as VIP.

Det beschuûtje wuerd dan unne bitterbal met un lekker glaeske wien, beej meziék smak det prima..

Wilt ge nog waat kwiet euver Spanje.

Toos-Mientje:

As eemus van plan is naor Zuid-Spanje op vakantie te gaon bring dan un bezoek aan ut **ALHAMBRA** in Granada.

Un Moors Middelieuws Paliés en Fort waat midde in de Sierra Nevada leet en det steit op de UNESCO waerelderfgoodliès.

Bestel ut toegangskaertje waal van te veure want d'r waere maar 8000 minse per daag binne gelaote.

Ut bergdôrpke **MIJAS** is zeker un aanbeveling, de kins d'r good met de bus kômme.

In **ANDALUSIË** is ut meestal lekker waer, noow nog in de 20 Gr.

Aaf en toe waat raegen, waodoor alles moëj greun blief.

Hasta la Vista

Elly van Elswijk

